



Maklumat Terkini Inisiatif GTP untuk Separuh Tahun Pertama 2011 dikemukakan kepada Rakyat

KUALA LUMPUR, 4th Ogos 2011- Program Transformasi Kerajaan (GTP) yang diterajui oleh Unit Pengurusan Prestasi dan Perlaksanaan (PEMANDU) di bawah Jabatan Perdana Menteri, hari ini memberi maklumat terkini tentang 6 Bidang Keberhasilan Utama Negara (NKRA) sehingga separuh pertama tahun 2011 (Januari - Jun).

“Kesemua 6 NKRA – Mengurangkan Jenayah, Membanteras Rasuah, Mempertingkatkan Pencapaian Pelajar, Mempertingkatkan Taraf Kehidupan Isi Rumah Berpendapatan Rendah, Mempertingkatkan Infrastruktur Asas Luar Bandar serta Mempertingkatkan Pengangkutan Awam di Bandar - telah menunjukkan perkembangan yang menggalakkan sejak ia diperkenalkan. Keenam-enam NKRA ini bertujuan untuk membawa perubahan yang ketara supaya kerajaan lebih berkesan dalam penyampaian perkhidmatan awam serta lebih bertanggungjawab dalam memberi hasil ke atas perkara-perkara yang dipandang penting oleh rakyat. Ia juga bertujuan untuk menggerak Malaysia supaya menjadi masyarakat bertaraf hidup tinggi yang maju, bersatu dan adil,” kata En. Alex Iskandar Liew, Pengarah Komunikasi, unit GTP.

NKRA Mengurangkan Jenayah

Menurut En. Eugene Teh Yee, Pengarah NKRA Mengurangkan Jenayah, jenayah indeks telah melihat pengurangan sebanyak 9.6% dari bulan Januari hingga Jun 2011, berbanding tempoh yang sama pada tahun 2010. Kejadian jenayah jalanan secara keseluruhannya juga telah menurun ke 11,299 kes dari Januari sehingga Jun 2011, berbanding 19,346 kes bagi tempoh yang sama tahun 2009, menjadikan ia pengurangan sebanyak 41.6%.

Antara inisiatif-inisiatif tahun 2011 yang diketengahkan termasuk Penilaian Pelanggan PDRM dan ‘Hari Bertemu Pelanggan’. “Penilaian Pelanggan PDRM telah dilaksanakan di 82 stesen polis di negeri Selangor. Penilaian tersebut telah dilakukan melalui SMS dan bermula Ogos ini, mesin maklumbalas akan disediakan di semua stesen PDRM di seluruh negeri tersebut. Orang ramai akan berpeluang menilai perkhidmatan dan prestasi pegawai-pegawai siasatan di kaunter semasa membuat laporan,” jelas Teh.

“Melalui inisiatif ‘Hari Bersama Pelanggan’, rakyat yang prihatin boleh bertemu ketua-ketua polis peringkat daerah pada sesi yang ditetapkan. Tujuannya adalah untuk memastikan sebarang persoalan serta aduan rakyat ditangani dengan pantas. Dengan cara ini, pihak polis juga berpeluang mendapat maklum balas orang awam tentang inisiatif yang dilaksanakan untuk manfaat mereka,” katanya lagi.

Selain itu, 23.6%, atau 46,844 Kertas Siasatan (*Investigation Papers*) telah dihadapkan ke mahkamah dari jumlah 198,353 Kertas Siasatan yang dibuka dari Januari sehingga Jun tahun ini.

NKRA Membanteras Rasuah

Ringkasan keputusan NKRA Membanteras Rasuah telah dibentangkan oleh Pengarahnya, Encik Ravindran Devagunam. Antara maklumat utama yang disampaikan termasuk laporan terkini pelancaran Ikrar Integriti Korporat (*Corporate Integrity Pledge*) dan pembentukan Carta Liga Pihak Berkuasa Tempatan (*PBT League Table*) bersama pihak berkuasa tempatan.

Ikrar Integriti Korporat (CIP) adalah usahasama kerajaan, pihak kawal selia dan sektor swasta untuk menggalakkan syarikat-syarikat ini memainkan peranan mereka dalam bersama-sama membanteras rasuah. Semua syarikat adalah digalakkan menandatangani CIP, dan sehingga Jun 2011 sudah terdapat 26 buah syarikat yang telah menandatangani ikrar tersebut, termasuk 13 daripada 19 Projek Pemulaan (*Entry Point Projects* (EPP)) yang diumumkan sejak April tahun ini di bawah Program Transformasi Ekonomi (ETP).



Carta Liga Pihak Berkuasa Tempatan adalah hasil usaha Kementerian Perumahan dan Kerajaan Tempatan (KPKT) yang akan membolehkan orang ramai melihat perbandingan prestasi pihak berkuasa tempatan (PBT), berkaitan dengan perkara-perkara seperti pelan integriti mereka dan bilangan aduan terhadap pihak berkuasa tempatan. Cadangan ini adalah dalam peringkat akhir reka bentuknya dan dijangka akan dilaksanakan sebelum suku akhir 2011.

"Kami sedang bekerja rapat dengan kementerian-kementerian dan agensi-agensi kawal selia untuk memantau sasaran yang perlu dicapai bagi meningkatkan keberkesanan usaha Kerajaan dalam membanteras rasuah. Satu petunjuk prestasi menarik yang telah kami perkenalkan ialah persepsi rasuah di kalangan agensi-agensi penguatkuasaan undang-undang utama, di mana kami telah mula memantau sejak beberapa bulan yang lalu, dan ia telahpun menunjukkan keberhasilan (*sila rujuk kertas fakta yang disediakan*).

Di samping itu, 1,951 daripada 2,324, atau 84% kontrak Kerajaan yang dianugerahkan kini tertakluk kepada Pakatan Integriti (Integrity Pact) Kementerian Kewangan. Sehingga kini, sudah terdapat 237 nama dalam pangkalan data pesalah rasuah, mengatasi sasaran tahun 2011 sebanyak 100," kata Pengarah NKRA Membanteras Jenayah.

NKRA Mempertingkatkan Pencapaian Pelajar

Inisiatif-inisiatif untuk Mempertingkatkan Pencapaian Pelajar telah dibentangkan oleh Tengku Azian Tengku Shahrman, Pengarah NKRA, Mempertingkatkan Pencapaian Pelajar.

Inisiatif literasi dan numerasi di bawah program LINUS telah memenuhi sasarannya lebih cepat daripada yang dijangka bagi tahun ini. "Sasaran untuk celik huruf ialah 95% menjelang akhir tahun ini dan kita telah pun mencapai 90% untuk separuh tahun ini, manakala sasaran numerasi 95% telahpun dipenuhi pada bulan Jun. Ini memberi ruang untuk pertumbuhan peratusan yang lebih besar berbanding dengan sasaran tahunan," kata Tengku Azian.

Satu penunjuk prestasi yang baru di bawah NKRA ini ialah Program Pembangunan Prestasi Sekolah yang bertujuan mengurangkan jumlah sekolah Band 6 dan Band 7 pada tahun 2010 sebanyak 20% dengan menyediakan bantuan dan sokongan tambahan seperti *School Improvement Toolkit (SIT)* dan peruntukan Rakan Pembangunan Prestasi Sekolah (*School Improvement Partners*) dan Pakar Pembangunan Prestasi Sekolah (*School Improvement Specialist*) untuk meningkatkan prestasi sekolah-sekolah tersebut.

NKRA Mempertingkatkan Taraf Kehidupan Isi Rumah Berpendapatan Rendah

Dr. Chua Hong Teck, Pengarah NKRA ini membentangkan butiran sasaran dan pencapaian bulan Januari 2011 sehingga Jun 2011. Antara pencapaian utama yang dikenal pasti termasuk pembangunan 430 usahawan wanita sehingga Jun 2011. Seramai 1,000 usahawan wanita dijangka dilahirkan menjelang akhir tahun ini.

Satu lagi pencapaian utama adalah kejayaan berterusan Program 1AZAM. "Kami amat teruja dengan sambutan program 1AZAM di mana 20,650 ketua isi rumah dan ahli isi rumah telah mula menyertai program ini. Ramai yang telah mula bekerja sebagai hasil inisiatif AZAM Kerja. Ramai juga telah menerima peralatan dan pinjaman daripada penaung masing-masing melalui inisiatif AZAM Tani, AZAM Niaga, dan AZAM Khidmat," kata Dr. Chua.

Penunjuk prestasi yang baru telah diperkenalkan tahun ini dengan matlamat melengkapkan proses pengesahan eKasih yang tertunggak, yang didaftarkan sebelum 31 Mei 2011.



NKRA Mempertingkatkan Infrastruktur Asas Luar Bandar

Maklumat terkini NKRA ini telah dibentangkan oleh Pengarahnya, En. Eugene Teh Yee. NKRA ini terdiri daripada empat program iaitu jalan raya, air, elektrik dan perumahan.

Sehingga Jun 2011, 474.4 km jalan luar bandar di seluruh negara telah dibina, di mana ia merupakan 104% daripada sasaran tahun ini. Kemajuan bagi penyediaan bekalan air dan elektrik juga berkembang dengan baik dengan 12,004 dan 2,906 isi rumah masing-masing telah diberi bekalan air dan elektrik. Untuk perumahan, 2,567 unit telah dibina atau diubahsuai sehingga akhir bulan Jun.

"Pembangunan fizikal ini berfungsi sebagai pemangkin kepada kemajuan sosial dan ekonomi. Kesimpulannya, inisiatif-inisiatif ini adalah untuk memperbaiki kehidupan rakyat Malaysia yang tinggal di kawasan luar bandar. Akses kepada infrastruktur adalah hak asasi," kata Teh.

NKRA Mempertingkatkan Pengangkutan Awam di Bandar

Encik Ahmad Suhaili Idrus, Pengarah NKRA Mempertingkatkan Pengangkutan Awam di Bandar menerangkan tentang *Bus Expressway Transit* (BET) dan pelancaran sistem tiket tanpa tunai RapidKL.

Pelancaran BET 6 pada Jun 2011, telah menjimatkan lebih satu jam masa perjalanan penumpang dari Bukit Beruntung ke Kuala Lumpur berbanding dengan laluan sebelumnya. Pelancaran 'Touch n Go' tanpa tunai RapidKL melihat penembusan 67% dalam tempoh empat bulan terakhir sejak ia diperkenalkan pada bulan Februari 2011.

"Bagi penumpang rel, kami telah melihat peningkatan sebanyak 15.7% dari Januari 2011 sehingga Mei 2011 berbanding tempoh yang sama pada tahun 2010. Ini boleh diterjemahkan sebagai peningkatan sebanyak 79,269 orang penumpang. Pencapaian ini adalah hasil operasi penuh 29 set empat-gerabak baru untuk aliran LRT RapidKL Kelana Jaya," kata Ahmad Suhaili.

Untuk maklumat terperinci sasaran dan pencapaian 6 NKRA separuh tahun 2011, sila rujuk kepada kertas fakta ringkasan GTP NKRA yang disediakan dalam kit media.

Editorial Contact

Alex Iskandar Liew

Pengarah Komunikasi, unit GTP

Tel: +603- 8872 7206

Fax: +603- 8872 7208

E-mail: alex.iskandar@pemandu.gov.my